

## Porfin Skol ta Kuminsá...

Porfin mi no mester kòrda riba e yunan na kas. Porfin mi no tin ku pensa unda mi ta manda nan, i plania kiko nan ta bai hasi durante e oranan ku mi ta ousente na trabou: fakansi plan?, laga nan na kas ku televishon?, manda nan serka famia?, èts. Porfin mi no tin ku kibra kabes ku esei, pasobra porfin mi por manda mi yunan serka dosente na skol mientras mi ta na trabou! Porfin fakansi a kaba i skol ta kuminsá atrobe! Ki un alivio!

Hopi mayor tin e mentalidat ei. Di bèrdat, nan a demonstrá e pensamentu ei fo'i tempu ku e mucha a nase. Kasi por bisa ku e mama nobo ta hiba su beibi dirèkt fo'i hòspital pa krèsh. E mayornan no tabatin tempu pa e intruso ku ta introdusí tur klase di kambio inkombiniente den nan bida okupá. Despues di graduá di krèsh, e yu a hasi parada na bewarskol, skol básiko, Komunitat di Skol Boneriano, anto Hulanda. Diripiente e yu ku nan nunka tabatin tempu p'e, awor ta hasi falta.

Den pasado no tabata asina. Añanan pasá, no tabatin krèsh, no tabatin bewarskol, i asta tabatin poko skol. **Ma ken a haña mihó edukashon—nos grandinan di aña 1903 òf alumnonan awendia di 2003?**

Mi no ke promové pa nos bai bèk na un era ku tabatin hopi analfabetismo, poko konosementu di fórmulanan di matemátika, i sigur ningun konosementu di kompiuter. Hopi mucha e tempu ei no por a bai skol, òf mester a kita di skol pa yuda e famia kubri gastunan.

**Ma ta un echu ku mayornan den e era ei a dediká tempu pa nan yunan, a siña nan balornan, a sòru pa nan haña siertu edukashon spiritual maske Beibel tabata un Buki prohibí.** Sigur tambe tabatin malamucha i mal mayor. Ma en general, nan a lamta ku un mentalidat responsabel, konosiendo sierto norma i balor bíbliko.

**Awendia nos hóbennan tin tur klase di diploma den man, ma no ta prepará pa bida!** Nan por lesa tekstonan kompliká na diferente idioma, ma nan no sa mes kon pa lesa Beibel. Nan ta prepará pa ta “profeshonal” den e ramo ku nan a studia, ma nan ta ignorante di e kontenido di e Dies Mandamentunan.

Hopi mayor awendia ke sa ku skol ta e solushon mágiko ku muchanan (i nan mayornan) tin mester. Nan ta manda e yu skol ku e antisipashon ku e dosente no solamente lo dun'é un bon edukashon, ma tambe kambia su mal karakter, stret e yu unda e mayor mes a faya, siñ'é étika, èts. mientras nan (e mayornan) ta kore tras di sèn! Nan ta kontentu ku skol di bario ta sòru pa e yu despues di skol, pa nan por dediká mas tempu pa nan metanan materialista. Nan ta malamente kiboká!

Tata, mama, bo yu ta **BO** yu. Ningun otro por remplasábo! Ningun otro lo stima bo yu manera abo ta stim'é, ningun otro lo forma bo yu manera abo por hasi! Skol no por remplasábo. Bo yu ta bo responsabilidad! Si abo—komo mayor—no ta sakrifiká tempu pa duna bo yu e edukashon importante pa bida, ken lo hasié? No pensa ku e dosente mester hasi un milager ku e yu ku bo no tin tempu p'é! Hopi dosente lo hasi nan bèst...ma nan ta sumamente limitá. Nan tin nan man yen ku binti òf trinta piku otro mucha...fuera di nan mes famia.

**Edukashon di yunan ta responsabilidad di mayornan.** Dios a bisa, “*E palabranan aki, ku mi ta ordinábo awe, mester ta riba bo kurason. Siña nan ku tur diligensia na bo yunan, i papia di nan ora bo ta sinta den bo kas, ora bo ta kana riba kaminda, ora bo ta bai drumi i ora bo ta lanta*” (Deuteronomio 6:6-7).

**Mayornan, tuma bo responsabilidad na serio! Traha tempu—sakrifiká tempu—pa kumpli ku e responsabilidad importantísimo di eduká nan yunan.** E generashon aktual ta responsabel pa esun binidero. Si bo ta faya ku bo yunan, ki speransa tin pa bo nietonan i bisanietonan?